

MEDIJI



PRAVNI OKVIR

Rad elektronskih medija (radija i televizije) u Bosni i Hercegovini regulisan je Kodeksom o emitovanju radio televizijskog programa, te u slučajevima kršenja odredbi Kodeksa, Regulatorna agencija za komunikacije je ovlaštena da primjenjuje određene sankcije: usmena i pismena opomena, novčana kazna, obustava emitiranja i oduzimanje dozvole.

Za razliku od radija i televizije, štampani i online mediji rade na principu samoregulacije, odnosno dobrovoljnog članstva u samoregulacijskom tijelu - Vijeću za štampu. To znači da za kršenje Kodeksa za štampu i online medije nema zakonski predviđenih sankcija.

ANALIZA MEDIJSKOG IZVJEŠTAVANJA

Prva Bh. povorka ponosa, održana u septembru u Sarajevu, bila je jedan od najviše medijski praćenih događaja u BiH, koji je medijima i novinarima skrenuo pažnju na postojanje i problem LGBTIQ osoba u bh. društvu.

Koliko su LGBTIQ teme u 2019. godini bile prisutnije u medijima, govori činjenica da je u 15 analiziranih medija objavljen ukupno 1701 tekst/prilog, dok je u tri puta većem broju medija koja su analizirana u prošloj, 2018. godini, objavljeno samo 400 tekstova/priloga više.

